



**Месяца июля в 29-й день**

**Рождество великаго святителя  
и вселенскаго чудотворца Николая**

**НА МАЛОЙ ВЕЧЕРНИ**

**На Господи, воззвах: стихиры на 4, глас 1.**

**Подобен: Небесных чинов:**

**Н**ыне светло празднуем святителя и чудотворца Николая преславное рождество, от праведники бо возсия нам, от добляго Феофана и благочестивыя Нонны, великий светильник, святитель Христов, просвещает наши сердца и помышления.

**Н**ыне, святителю Николае, душа твоя пребывает в горнем Иерусалиме со святыми ангельскими силами и во

славе праведных, но свыше, святителю, и нас назирай, празднующих любовью день рождества твоего.

**Н**ыне отечество твое, святителю, град Ликия светло празднует святое и славное рождество твое, и мы с ними купно веселящися, вопием: ты еси, отче, похвала наша и утверждение.

**Слава, глас 4:**

**В**сечестное твое рождество, отче Николае, ангелов множество на небеси и человеческий род на земли честно ублажает, яко святитель Вышняго во святем рождестве твоём пронаречен еси, Того моли о нас не престай, молимся, яко на тя упование возлагаем, святителю Николае.

**И ныне, Богородичен.**

**На стиховне стихиры, глас 2.**

**Подобен: ДOME Евфрафов:**

**Д**несь ныне, земнороднии, примите чистоты рачителя, Духа Божественнаго приятелище, Ликиом славу и всем земным удобрение.

**Стих: Праведник яко финикс процветет:**

**П**риидите ныне, празднoлюбцы, светло торжествуем в честнем рождестве великаго отца и таинника Христова.

**Стих: Насаждени в дому Господни:**

**П**риидите, сошедшеся с Давидом вкупе возопиим: днесь род правых благословляется, от праведных родителей святитель Вышняго нам раждается.

**Слава, глас 4:**

**В**семірная радость, от праведник возсия нам днесь рождество твое, святителю отче Николае, иже премногия ради твоя чистоты храм Божий одушевлен явился еси и во святителех предивен познаваешися, того молитвами, Христе Боже, мир мірови низпосли и душам нашим велию милость.

**И ныне, Богородичен.**

**Тропарь, глас 4:**

**Ч**удное и славное рождество твое, святителю Николае, Церковь днесь православных светло празднует, ибо стоянием ногу твоею яви тя Господь и провозвести быти светильника и учителя миряном, весь мір обогащающа и просвещающа чудесы. Тем вопием ти: моли Христа Бога спастися душам нашим.

**Тропарь, глас 2:**

**Д**несь возсия нам, яко солнце, торжество твое, отче Николае, ибо в рождестве твоём дивным стоянием ног твоих ангелы возвеселил еси, и человеки удивил еси, противныя же устрашил еси, темже ныне и Христова Церковь украшается яко невеста, и высоким гласом вопиет весело: уяснися моя доброта прекрасно, приидите вернии, возвеселитесь и подымите спасение ваше и душевное нетление, в бедах скорого помощника, в скорбех посетителя, в мори обуреваемых тихое пристанище, алчущих питателя, слепых вождя, нищих богатство, старцев жезл, юных наказателя и чистоты учителя, и вси притекающии с верою приемлют исцеление душам и телом.

### **Слава, и ныне, Богородичен:**

**В**ся паче смысла, вся преславная Твоя Богородице таинства, чистоте запечатанной и девству храниму, Мати позналася еси неложна, Бога рождши Истиннаго, Того моли спастися душам нашим.

### **НА ВЕЛИЦЕЙ ВЕЧЕРНИ**

**На Господи, воззвах: стихиры, глас 2.**

**Подобен: Киими похвальными венцы:**

**К**иими похвальными венцы венчаем святителя в чудеснем рождестве его; плотию бо в Мирех суца, духовно же всех достизающа, и всю вселенную озаряюща, иже чисте того любящим, всем предстателя и заступника, и всем скорбным утешителя, благочестия столпа, верным поборника, егоже ради шатания врагов Христос низложи, имей велию милость.

**К**иими песньми похвалим святителя в честнем рождестве его; нечестию противоборца и благочестию поборника, Церкви первостоятеля, великаго защитника и учителя, и теплаго пособника, злославныя посрамляюща, потребителя Ариева, егоже ради сего шатание Христос низложи, имей велию милость.

**К**иими духовными пении и песньми восхвалим святителя во славнем рождестве его, далече бо суца провидяща и отстояща яко близ суца, и в рождестве своем стоянием честных ног пророчествующа неложно, еже всей вселенней хотящи быти назирателя, и обидимым избавителя, царем окормителя, и связанным разрешителя, и от неправедныя смерти свободителя, и всем дарующа верным велию милость.

**Слава, глас 6:**

**С**вятителем удобрение и отцем славу, источника чудес неисчерпаемого и верным заступника великаго, сошедшеся, о празднлюбцы, цветы добродетелей взявше, песненными похвалами воспоем, глаголюще: радуйся, в Мирех Ликийских рожденный и всему миру вожделенный, верным хранителю и наместниче честный и столпе непоколебимый. Радуйся, светильниче всесветлый, иже мирския концы просвещаяй чудесы. Радуйся, печальным Божественное радование и обидимым теплый поборниче. И ныне, всеблаженне Николае, не престай моляся Христу Богу о чтущих верою и любовью приснорадостную и всепразднственную память рождества твоего.

**И ныне: Кто Тебе не ублажит:**

**Вход. Прокимен дне. Чтения святительския.**

**На литии стихиры, глас 2:**

**Отче Николае, аще и Мирская страна израсти тя, но мир весь, иже тобою просвещенный, мирными благоуханиями и чудес множества, взывает похвальными песньми, и спасшиися тобою неосуждени, с сущими в Мирех, и мы поюще вопием: моли спастися душам нашим.**

**глас 4:**

**Отче Николае, закона судьбами, яко сад при водах насажден бысть и в дому Божиим преславно процвел еси, и всех верных чудесы предивными возвеселил еси, темже и ныне прииди, отче, посреде нас невидимо, и озари нас от Бога данною ти благодатию во светлем сем торжестве, в честнем твоём рождестве, богоносе Николае.**

**глас 8:**

**Доблестей твоих, преподобне отче, плоды просветил еси верных сердца чудесными блистаниями. Кто бо слыша о сем не удивится, яко во святем рождестве твоём стоянием ног твоих предивен и непреклонен явился еси, досточудне Николае. Темже и нас, поющих и хвалящих тя, присно избави от враг видимых и невидимых твоими к Богу молитвами и спаси души наша.**

**глас тойже:**

**На хвалу потекл еси Господню, Николае, во временней жизни, и Той тя прослави на небесней истинней жизни. Темже дерзновение стяжав к Нему, моли спасти души наша.**

**Слава, глас 6:**

**Днесь верных собори сошедшеся, воспоем вкупе согласно предивнаго отца святителя Николая торжество, зачатие бо его честно, и рождество его свято, и во**

младенчестве его дивная всем явишася, темже вопием ему: сосуде святоизбранный, столпе и утверждение Церкви, Царствия наследниче, не премолчи вопити о нас ко Господу.

**И ныне, Богородичен: Творец и Избавитель мой:**

**На стиховне стихиры, глас 5.**

**Подобен: Радуйся, Живоносный Кресте:**

**Радуйся, явивыйся деннице пресветлая пребезначального света Владыки, радуйся, заре тайного света, иерарше Христов Николае, предвари и подвигни пречистыя твоя молитвы о нас ко Господу, празднующих верою память рождества твоего, во еже избавити нас от всякия напасти и лютыя наша болезни исцелити. Отче, тебе бо заступника имамы и умильно с верою вопием ти: молися о нас Христу Богу даровати нам велию милость.**

**Стих: Праведник яко финикс процветет:**

**Радуйся, главо преосвященная и Богу вожделенная, и от праведных родителей якоже вторый Самуил в дар Богу возложенный, и явился еси честное добродетелей жилище, бодреное правило непорочного священства, пастырю добрый и пресветлый, превеликий светильниче, иже победоподобное носяй имя, требующих милостивно прошения исполнявши, приклонялся к молитвам молящихся. Граде спасенный и одушевленный, притекающим к тебе избавителю готовейший, всем верою поющим твое преславное рождество, даруй нам велию милость.**

**Стих: Насаждени в дому Господни:**

**Радуйся, честный грозде зрелаго плода, от праведники ныне явился еси яко пресветлая заря, и всем нам предивен познаваешися, отче Николае, честный уме, Троицы честный сосуде, столпе церковный, верным утешение, побеждаемым помощь, и ныне во светлех торжестве рождества твоего богоприятными твоими молитвами разори напастей и скорбей наших тьму, святителю Николае. Ты бо еси истинный и любезный пастырь и отец наш, и мы овцы пажити твоя, и в помощь тебе призываем, даруй нам велию милость.**

**Слава, глас 2:**

**Приидите, христоименитых людей собор и всех верных сословие, днесь ныне в лице ставше, светлым гласом возопиим: блажен еси Феофане, яко такову отроку быв родитель, хотящаго родити словом учения многих ко спасению. Блаженна ложесна твоя, Нонно, имиже носила еси, и красна сосца твоя, имиже воздоила еси хотящаго**



напитати душетленным гладом таюция. Блаженно отечество ваше, град Ликия, и вся окрестная его. Но помолимся вама блаженная, еже молити его о нас, да испросит у Христа мира мірови и душам нашим велию милость.

**И ныне, глас тойже: О, чудесе новаго:**

**НА УТРЕНИ**

**На Бог Господь: тропарь святаго. Слава и ныне, Богородичен воскресный.**

**По 1-м стихословии седален, глас 1.**

**Подобен: Гроб Твой:**

**В Мирех рождься, святителю, миром разумно духовным явился помазан, отче Николае, темже миры чудес твоих мір облагоухал еси, миро приснотекущее проливая, иже мирными твоими благоухаемыми чудесы почитающих торжество твое и нас, раб твоих, обогати.**

**Слава и ныне, Богородичен:**

**Всем Творца, Бога же и Содетеля, Всенепорочная, Чистая, Духом Божественным в ложеснах заченши и тления кроме родила еси, Егоже славяще, Тя воспеваем, Дево, яко Палату Царя всех и міру заступление.**

**По 2-ом стихословии седален, глас 8.**

**Подобен: Премудрости:**

**Источник чудес от Бога явился еси, мудре Николае, темже, отче, в рождестве твоём дивен явлься, всем бо верным источаеши спасения воды, от Бога благодать прием, темже дерзновение имея к Нему, моли о чтущих верою и любовию память рождества твоего, всеблаженне Николае.**

**Слава, и ныне, Богородичен:**

**В кал греховный впадох и нет мне постояния, люте погрузи мя буря согрешений, но яко рождши Слова Единаго, Человеколюбца, на мя, раба Твоего, призри и избави всякаго греха, и страстей душетленных, и всякаго озлобления льстиваго врага, Богородице неискусомужная, моли Христа Бога грехов оставление подати ми, Тя бо имам надежду, раб Твой.**

**По полиелеи седален, глас 5.**

**Подобен: Собезначальное Слово:**

**Ныне, отче святителю Николае, отечество твое град Ликия светло радуется, и вся Вселенная день рождества твоего честно празднует. Темже и мы днесь, во храме твоём**

сошедшееся, вкупе с ними похвальная приносим ти, глаголюще: радуйся, отче Николае, всех покрове и заступление.

**Слава, и ныне, Богородичен:**

**Неискусобрачная Невесто, Приснодево, со святители непрестанно восхваляем Тя, яко Тобою нам величия сотвори Сын Твой и Бог Превечный от Отца, Иже в ложеснах Твоих вместится изволивый, да от лести свободит род наш.**

**Степенна 1-й антифон 4-го гласа. Прокимен, глас 4: Праведник яко финикс процветет и яко кедр иже в Ливане умножится. Стих: Насаждени в дому Господни: Евангелие от Матфея, зачало 11.**

**По 50-м псалме стихира, глас 6. Днесь верных собори сошедшееся: Писана на литии Слава.**

**Канон Пресвятой Богородицы со ирмосом на 6.  
Канон святителю и чудотворцу Николаю, глас 3.**

**Песнь 1**

**Ирмос: Дивно, славно творяй чудеса:**

**Дивен и славен еси, Господи, творяй чудеса, деливый море, и воду из камене источивый жаждущим людем, напои убо, Блаже, и мене росию Твоя благодати, да возмогу воспети угодника Твоего преславное рождество.**

**Дивное и славное рождество твое, святе Николае, от любве душевныя хошу похвалити, но недоумением содержим, боюся трепеща, зане вем, яко не красна похвала во устех грешников. Но обаче, дерзая на благоутробие твое, славлю святое твое рождество.**

**Дивна воистину и славна, святителю, память рождества твоего, яко звезда утренняя посреде облак, и яко солнце сияя на Церковь Вышняго, и яко дуга на облацех славы, тако сияет хвала твоя на тверди церковней, отче Николае.**

**Дивнаго и преславнаго святителя на преславное рождество христоименитии стекшесе, усердно соберитесь и славу Господеви воздадите, яко дарова нам такова пастыря и учителя нелестна, и путеводителя, и от бед свободителя, еретиком же посрамителя.**

**Богородичен: Дивна и преестественна тайна рождества Твоего, Богородице, кий слух слыша не удивится Богорождению Твоему, яко во утробе Своей Создателя всех нетесно вместила еси, и паки Дева пребыла еси.**

### **Песнь 3**

**Ирмос: Непогодная душа:**

**Непогодну** имам душу аз окаянный, како ты могу похвалити, святителю; воистину ты, отче, плод благохвальный, душу мою плодоносу покажи, да возмогу воспети святое твое рождество.

**Непогодна** быста родители твоя по рождестве твоём, святителю Николае. Естеству убо поведаящу, яко не могут другаго такого родити, добродетельми же яко Авраам плодна и верна быста, того ради и мзду о вере своей от Бога тебе приятна.

**Непогодных** чресл честное прозябение, святителю, слыша, кто не удивится, рождшуся бо тебе, святе, воистину дивная о тебе яви Господь, трем бо часом неуклонно тебе стоящу на земли, идеже хотяше омыться, чудне Николае.

**Богородичен: Непогодных** ложесн Рождение, Пресвятая Владычице, но рождши нам Христа, Плода Безсмертнаго, питающаго всяко создание и смотряющаго всю тварь, Богородительнице.

### **Седален, глас 5.**

**О** блаженная версто и благословенное супружество прекраснаго душею Феофана и боголюбивыя Нонны, Божественным бо желанием совокуплени быста, и израстивша нам прекраснаго плода, чуднаго Николая, не токмо бо яко цвет шипка или крина при исхождении воды или стебло ливаново во дни жатвы, но истиннаго плода реку, отца сирым и вдовицам заступника, богатство нищим и болящим здравие и утешение, и сущим в богатстве окормление, старости подпор и юности обучителя, благочестия окормителя, еретиком же и бесом губителя. К нему же мы ныне возопиим: отче святителю Николае, моли спастися поющим тя.

**Слава, и ныне, Богородичен:**

**Блаженна** ложесна Твоя, Богородительнице Дево, яко ширши Небес явльшася, словом бо составляющаго тварь во утробе Своей безсеменно имела еси, и во объятиих Своих нетрудно носила еси, тем молим Тя, Всеблаженная, еже молити от Тебе рожденаго Христа, Бога нашего, во еже спастися поющим Тя.

### **Песнь 4**

**Ирмос: Покрыла есть небеса:**



**Покрыла** есть яко облак любви твоя и благодать твоя, юже имаши от Бога, святителю Николае, всех призывающих имя твое святое, всюду бо неоскудно подаваеши и коегождо прошения исполняеши. Прииди и ныне посреде нас невидимо и посети нас, озлобленных грехми, любовию празднующих пречестное твое рождество.

**Празднуется** и украшается рождеством твоим, святителю, яко мнисты, Церковь Христова, и невестски светло одевается и красуется, веселяся и вопия радостно, глаголя: приидите и видите желаемого мною небеснаго гражданина и служителя Христова, днесь рождшася от благоверны родители.

**Память** рождества твоего, отче святителю, всем человеком бысть веселие. Покрый нас, отче всечестне, призывающих тя с верою и празднующих честно торжество праздника твоего, святителю Николае.

**Похваляему** бо праведнику возвеселятся людие, якоже рече Писание. Днесь ныне мы грешнии, в рождестве твоём, отче Николае, радуемся и веселимся духовне, Христа славяще, Иже тебе таковую благодать даровавшего, яко Того хваления исполнь земля.

**Богородичен:** Пресвятая Богоневесто, рождшая Христа, Правителя и Содетеля всем, немощствующую душу мою исцели и настави мя на деяния благая, да всегда славлю Тя Преблагословенную.

### **Песнь 5**

**Ирмос:** *На земли Невидимый явился еси:*

**На** земли, отче святителю, явился верным твое святое рождество, воистину любезное торжество, якоже бо ливан в кадильнице или яко маслина износящи плод, тако нам память рождества твоего, отче милосерде Николае.

**На** земли днесь ныне, святителю, познан бысть и, яко от Бога познан был еси, прослави бо тя Господь в рождестве твоём, ибо стоянием честных ног твоих являя хотящее быти на тебе дарование.

**На** земли ныне Церковь православных веселится, святителю Николае, и ликует с чады своими в памяти рождества твоего, милосерде, и вопия глаголет: уяснися ныне доброта прекрасно и никогдаже угаснет.

**Богородичен:** **На** землю во чрево Твое, Чистая, яко дождь на руно сниде Господь и Бог наш, и от Твоих пречистых девических кровей плоть прием и чудодействова, и пострада, и възде на Небеса, с Собою возвышая праотца.

## Песнь 6

**Ирмос:** Глубина страстей воста на мя:

Глубина страстей воста на ны и буря противных ветров, но предвари нас, отче святителю, и разори сопротиволежащий на нас совет лукаваго, и лукавых человек стремления, хвалящихся о злобе своей, спаси ны от них, милосерде Николае.

Глубине богатства Божия дивитися суть должно, дела же Божии славити зело есть лепо, памяти же святых чтити вельми есть полезно. Почтим убо и мы, братие, и возлюбим возлюбленнаго Богом святителя Николая, како во святем младенстве его дивная о нем показа Бог. Питаше бо ся, но не тако, якоже обычай детем, в среду же и пяток единою касашеся, и то к вечеру, от леваго же сосца отнюд не ссаше, прознаменуя десное жития его.

Глубиною мудрости промышляяй о всех Господь, прежде противны ветров тишину уготавлиает, на Ариев убо плевел огонь вжигает, сего дивнаго реку и преславнаго святителя Николая рождество являет, прореченном от апостола Павла, егоже предуведе Бог, сего и предъизбра, и оправда и прослави.

**Богородичен:** Глубине таинству Богорождения Твоего кто не удивится, Пресвятая Дево Владычице; веков бо Творец вселися в Тя, и плоть от Тебе приим умну и словесну, вся человеки обожи.

## Кондак глас 3.

**Подобен:** В Мирех, святе:

В Мирех рождься, святе Николае, от благородна корене, яко благоплодна ветвь прозябл еси, исполнь бо быв Божественных даров, яко солнце зарями весь мир чудесы просветил еси, сего ради прославляем тя, яко ученика и таинника Божия благодати.

## Ин кондак глас 3.

Яко звезда пресветлая просиял еси, блаженне Николае, посреде Ликий града от праведники родился еси, отче, и в честнем рождестве твоем чудна и славна тя показа Господь, и во святем младенстве твоем дивная явлена быша о тебе, Троицу бо проповедал еси трех часов стоянием честных ног твоих на земли в час рождения твоего, и от сосца деснаго питашеся, от леваго же никакоже, в среду же и в пяток единою, токмо во время вечернее, и оттого, отче, познан был еси воздержания нелестное правило, и яко имаши быти велий таинник Божия благодати.

### **Икос:**

**Приидите ныне с нами, братие, и купно духовне возвеселимся во святем торжестве Богоноснаго отца нашего святителя Николая, и прославим преславно рождшагося, и от утробы освященного, и Божественнаго Духа приемшаго, и Святую Троицу в час рождения своего стоянием ног своих проповедавашаго, и всех человек удивльшаго, хваляще святое и чудное рождество его. Любовью и правостию сердечною благодарная к нему сице рцем: радуйся, от матерних ложехн Богу возложенная и от Него усвоенная и освященная главо, сокрушивый проклятому сатане главу. Радуйся, предъизбранный и освященный сосуде и Богу возложенный и возлюбленный. Радуйся, царем правоверным помощи и окормление, и на враги победа и одоление, и Православию утверждение. Радуйся, в Духа Святаго облеченный и на благодеяние благочестивым поданный. Радуйся, нечестивых потребителю и на страх их явленный. Радуйся, бесом прогонителю и еретиком обличителю. Радуйся, яко во святем рождестве твоём дивен всем познанный, яко имаши быти великий таинник Божия благодати.**

### **Песнь 7**

#### **Ирмос: Трие отроцы в пещи:**

**От Троицы Бога проповедал еси, чудне Николае, темже и почести от Него венец приял еси, блаженне, и ныне в торжестве твоём усердно призывающих тя не забуди нас, раб своих, но свыше назирай, тя бо имамы крепка молитвенника.**

**Скрижалъ в сердце своем от младенства, отче Николае, стяжав дивных добродетелей, написанну безсмертным пречистым перстом Христа Бога нашего, моли Его о нас, во еже написанным нам быти в книзе животней, святителю отче Николае досточудне.**

**Во святем рождестве твоём, святителю отче, Богом познан был еси и Бога познал еси, и весь бысть Божие жилище, весь явился орган духовный, возглашающ всяку добродетель Богодуховенных пеней, спасения сказания и доброту являя Небеснаго Царствия, святителю Николае.**

**Богородичен: С Богом Заступницу Ты стяжахом, Ты бо Божия Мати бысть Творца и Содетеля, и наше воображение приемша Всенепорочная, и сие спасша от тли и смерти, и славою Божественною прославльшаго.**

## **Песнь 8**

**Ирмос:** *Ангельми немолчно:*

**А**нгелы дивятся, видяще преславная в час рождения твоего, отче Николае, человецы же радуются, приемлюще тя яко своего благодетеля и к Богу молитвенника неуклонна, всем бо явился еси радость спасения, милосерде Николае.

**К**то не почудится или кто не прославит имене твоего, отче святителю, слыша на тебе выше закона естественнаго бывшая знамения в рождестве твоём, и тем яви тя Господь светильника всему міру, во святем же младенстве твоём у матерних сосец показа тя изрядна и искусна, тем воистинну воздержанию нелестный учитель явился еси, святителю Николае.

**В**торый Предтеча на земли явился еси на обличение беззакония, отче Николае. Ов бо обличи Ирода беззаконновавшаго, ты же, отче, вся ереси далече от Церкви отгнал еси и вся соблазны и беззакония, яко хвастия, огнем ревности своя попалил еси, верных же утвердил еси, милосерде Николае.

**Богородичен:** *Дивлюся, святая Богоневесто Владычице, таинству Богорождения Твоего, всех бо Содетель в Тя вселися, и все человеческое естество на Небеса вознесе. Прибегающих под кров Твой прими и спаси ны, Богоблагодатная Владычице.*

## **Песнь 9**

**Ирмос:** *Благословен Господь Бог Израилев:*

**Б**лагословен еси Боже о всех, яже твориши, идеже бо хочещи, тамо побеждается естества чин, якоже и ныне в рождестве святителя Твоего выше закона естественнаго верным твоим дивная и пречудная явил еси, того молитвами, Христе, направи на путь мира.

**Б**лагословенна тя Богом, всем, отче Николае, благослови убо и мене, поющаго святое рождество твое, и руку помощи простри, и приведи к тихому пристанищу покаяния, яко да всегда славлю тя, отче Николае.

**А**ще и много беззаконновах аз окаянный, не отступаю надежды покрова твоего, отче Николае, всегда прибегаю и на тя надежду мою полагаю. Тем в нынешнем настоящем торжестве, во святем твоём рождестве радостно вопию ти: ты мя, отче, избави от всякия скорби, и бед, и печалей, елика бо хочещи, и можещи.

**Б**лаженне и Богоносе Николае, виждь тесноту души моя, како враг мой подвиже на мя брань на всяк день и не может истощити тулу стрел моих, но присно ураняет мя и

почити ми не дает, аз же изнемогах, но ты, отче, сокруши козни его молитвами своими, яко да прием помощь твою святую, непрестанно славлю тя.

**Богородичен:** Никтоже прибегаяй под кров надежди Твоея, Пресвятая Богоневесто, тощ исходит, но всяк просяй приемлет скорую Твою помощь, юже и мне подаждь, Отроковице, поющему пресвятое Твое Рождество.

#### **Светилен.**

**Воистину шлем и оружие на диавола непобедимое ты еси, отче Николае, от Бога явлен еси, христианом же поможение и утверждение, иерархом удобрение, в бедах же притекающим к тебе скорая помощь и заступление, святителю Господень. (дважды)**

#### **Слава, и ныне:**

**Облаче превьшший небес, радуйся, искапающий нам каплю душеспасительную, Богородице, Ты Всеблагая, подаждь от Бога царем нашим победы на враги и междоусобия бурю утиши, елика бо хочещи, вся можещи, яко Мати Господня.**

#### **На хвалитех стихиры, глас 4.**

##### **Подобен: Дал еси знамение:**

**Дар благоприятен, от родительных рук Богу возложенный, и от Него усвоенный, и на пользу верным поданный, святителю Николае, темже в тебе упокоися благодать Пресвятаго Духа, славне, беззлобием возрастивши ты и мудростию украсивши.**

**Днесь память рождества твоего, святителю отче Николае, яко солнце нам Богоносия возсия, лучи богатых дарований просвещаючи чтущих тя и верою блажащих, мглу же лютых отгоняючи, и прошения верным исполняючи, тем тя, досточудне, почитаем.**

**Божественную благодать от Бога приял еси, святителю Николае, юже прием свыше, и нас назирай, празднующих любовию честное твое рождество, и подаждь от Бога церквам единомыслие, и царем нашим победы на враги, и миру умирение, и земли нашей благоплодие, и душам нашим велию милость.**

#### **Слава, глас 2:**

**От корене благаго благий прозябе плод, иже от младенчества освященный, и якоже Самуил в дар Богу возложенный, отче святителю Николае, Божию бо благодатию паче, нежели млеко воспитанный, тем и на гору добродетелей взыде, преочищенну душу стяжав, и разум**



**имея присно к Богу, небесное бысть жилище Духа, Христова обитель явися. Того, блаженне, моли о нас, еже спастися душам нашим.**

**И ныне, Богородичен: глас тойже: Яко плодовита маслина, Дева:**

**Таже славословие великое и отпуст.**

**НА ЛИТУРГИИ**

**Блаженны. Прокимен, Апостол, Евангелие и причастен все святительское.**